

Karnival Jom Masuk IPT peluang pelajar pilih destinasi pengajian



Alor Setar, 30 Januari– Karnival Pendidikan Tinggi Negara (KPTN) 2016 buka tirai penganjuran dengan siri Jelajah Jom Masuk IPT yang berlangsung di perkarangan Stadium Darul Aman, Alor Star, Kedah dengan sasaran membantu pelajar membuat pilihan pengajian, jurusan yang bersesuaian serta menjadi medium saluran maklumat terkini mengenai peluang pendidikan yang ditawarkan.

Penyertaan melibatkan universiti awam, Jabatan Pendidikan Politeknik, Jabatan Pendidikan Kolej Komuniti, Institusi Pengajian Tinggi Swasta dan lain-lain agensi di bawah KPT.

Jom Masuk IPT 2016 merupakan kali ke-12 penganjuran oleh pihak Kementerian Pendidikan Tinggi Malaysia (KPT) telah menjadi acara tahunan dan menariknya pada tahun ini ianya dijalankan serentak dengan Jelajah "Soaring Upwards" yang dirasmikan Menteri Pendidikan Tinggi, YB Datuk Seri Idris Jusoh.

Dalam ucapannya, beliau mengalu-alukan kehadiran masyarakat setempat ke karnival ini bagi mendapatkan informasi yang tepat mengenai peluang melanjutkan pengajian ke IPT, Politeknik dan Kolej Komuniti, maklumat akreditasi serta bentuk pembiayaan bagi pemohon yang terdiri daripada pelajar lepasan Sijil Pelajaran Malaysia (SPM) yang setaraf atau peringkat Sijil Tinggi Pelajaran Malaysia (STPM) dan yang setaraf dengannya.

Katanya, pemohon yang berhasrat untuk mendapatkan tempat pengajian juga berpeluang menggunakan permohonan kemasukan ke IPTA melalui aplikasi dalam talian sepanjang karnival berlangsung. Kami berharap, pelajar akan lebih faham cara kemasukan ke IPT dan penggunaan kaedah yang mana 90 peratus mengambil kira akademik dan 10 peratus pula dari segi kokurikulum.



Bersempena dengan karnival ini UMP telah membuka booth pameran dan menawarkan khidmat nasihat kepada calon pelajar yang ingin mendapatkan maklumat tentang program yang ditawarkan.

Sementara itu, Timbalan Pendaftar Bahagian Pengurusan Akademik , Arman A. Rahim berkata, program sebegini dapat dimanfaatkan sepenuhnya oleh kumpulan sasaran yang ditetapkan untuk mendapatkan sebanyak maklumat yang boleh agar mereka berupaya membuat pilihan program yang tepat, bijak serta bersesuaian dengan kelayakan, minat dan cita-cita mereka.

“UMP menawarkan program dwijjazah Sarjana Muda Kejuruteraan Mekanik dan Kejuruteraan Automotif hasil kerjasama dengan Karlsruhe University of Applied Sciences (HsKA). Manakala program dwijjazah Sarjana Muda Kejuruteraan Perniagaan membabitkan kerjasama dengan Reutlingen University di Jerman,” katanya.

Ujar beliau, program dwijjazah yang telah mula ditawarkan ini membolehkan pelajar memperoleh Ijazah Sarjana Muda Kejuruteraan Perniagaan UMP dan Ijazah Sarjana Muda Operasi Antarabangsa dan Pengurusan Lojistik dari Reutlingen University apabila tamat pengajian nanti.

Antara bidang yang berkaitan kerjaya ini antaranya adalah eksekutif pengeluaran, jurutera, perancang pembuatan, jurutera proses kejuruteraan, jurutera industri, eksekutif lojistik, eksekutif rantaian pembekal, eksekutif kualiti atau jurutera, eksekutif projek, eksekutif pembangunan perniagaan dan dalam bidang berkaitan perolehan.

Karnival bakal berlangsung di beberapa destinasi lain termasuk 13-14 Feb (UNISZA, Terengganu), 20-21 Feb (Johor Bahru, Johor), 27-28 Feb (Kuching, Sarawak), 5-6 Mac (Kota Kinabalu, Sabah), 2-3 Apr UKM, Bangi.

Dengan sembilan fakulti yang terdapat di universiti ini, UMP beroperasi dengan dua kampus yang terdapat di Pekan dan Gambang.

Disediakan Unit Perhubungan Awam, Bahagian Komunikasi Korporat PNC